

續修陝西省通志稿

第一百零六冊

卷二百二

續修陝西通志稿卷二百二

文徵二

奏議二

奏東省暫時不能撤勇並請預儲北方將領疏

同治二年十一月山東巡

撫任內

閻敬銘

朝邑

東省綠營廢弛已久又兼歷年積欠俸餉既無良將遂成疲兵若驟加整頓撤勇用兵先須募兵足額籌給俸餉而又訓練需時不得不留勇以待勇糧兵糧同時並發司庫難以猝辦若先行撤勇恐竟屬教匪餘黨滋多沂蘭郯費之間受撫幅匪或懷蠢動東直交界降衆雖懾威反正革面未必革心即濟武屬縣鹽梟亦時藉兵威彈治此暫時不能撤勇之實情也臣非敢於事平之後擁兵糜餉亦非敢意存成見袒勇輕兵實因東省事變頻仍奸民多半

土著譬如新病初起肌膚之疥搔甫定臟腑之癥結未除盪滌需時薺苓宜備有非他省情形可比他省祇期能富即可自強東省必先自強乃可致富何則戈鋌不動斯農畝不廢耕耘強梁盡除則良懦自輸賦稅近年以來窮鄉僻壤或偶有奸民嘯聚兵符午發士馬夕臨兵不血刃而鄉民里甲即已縛獻兇渠不特丁曹較曩歲旺收且匪類知官司有備不敢造謀發難保全民命尤多此一時不能撤勇之小效也故臣不敢爲節齎帑項之浮詞作粉飾太平之下策敢爲我皇太后皇上陳之又兵之能強端特將領將領之才固由性生性生之賢亦資汲引如胡林翼曾國藩左宗棠倡率鄉里樂育人材王鑫李續賓李續宜彭玉麟楊岳斌蔣益澧諸臣誠有將材實賴推輓使朝廷知其可用日加拔擢自然頑廉懦立志士奮興故楚勇之名遂著即多隆阿亦賴胡林翼同官日

久所聞於林翼者皆忠君事上之言輕財重士之誼行軍用兵之
款信賞必罰之宜多隆阿質性忠良天資高朗遂成名將學成於
所習信不誣也前者僧格林沁奏稱不可盡用南勇啓輕視朝廷
之漸誠爲老謀碩畫且自古名將北人爲多臣北人也恥不習兵
才慚定亂因在軍多歷年所見諸軍之成敗利鈍胸中必往復求
其所以然之故深知紛冗雜湊之軍不求將而先湊兵則有兵與
無兵等有將與無將同今北方雖所在募勇直是匪徒烏合不知
尊君親上殺敵致果之方帶勇者功利薰心貪婪欺飾以之爲將
則兵譁以之辨團則民亂謬種流傳後患滋大病在不考其技能
不察其志趣謂弁兵即可出戰鎮協即可練兵無怪乎臨陣倉惶
將逃勇潰爲賊所笑故欲強北方之兵必先儲北方之將當今之
時北人智勇俱備馬步兼長者莫多隆阿若矣其部下曹克忠石

清吉皆有將材皆爲北產安見在楚將之下哉應請旨密飭多隆
阿募北方將士教之戰陣厲以忠純擇其忠勇樸直者疏請補授
北方及各省提鎮參遊即令蒞任練兵則萬一有警綠營均成勁
旅何必再募勇丁臣竊謂事莫有急於此者如其不然徒恃武科
技勇之材行伍資俸遷轉終蹈所養非所用所用非所養之覆轍
數十年後偶有撻伐仍慨然於用兵不如用勇也晚矣且南勇規
模猶在訓練易成又致誚於北勇誠不如南勇也亦屈矣伏乞聖
裁速飭施行軍事幸甚大局幸甚

按清史本傳此疏
上後詔如所請行

陳請終制疏

同治二年
山東巡撫任內

閻敬銘

竊臣於同治元年九月在湖北署藩司任內丁本生父憂奔喪至
晉衰絰之中迭承恩命擢署山東巡撫維時臣以哀毀餘生迫切
懇辭未蒙俞允仰荷四次溫旨諭臣以移孝作忠責臣以安民戢

盜臣威戴聖明知遇之恩未敢始終固執跡涉畏葸臣雖未諳軍旅自維金革不避竊願附執干戈衛社稷之列勉竭駑駘干犯名教冒昧從戎以求上答朝廷稍寬罪戾本年四月到任軍事方殷團逆踞於淄川教匪擾於兗郡東昌降衆勢漸燎原而山東營規久弛將不知兵晝夜焦思運籌恐悞幸僧格林沁勁旅東來先克淄城旋清鄒嶧移師堂冠併力驅除臣雖駐軍在外實無尺寸之功悚慙交集前因督率無方自請交部議處復荷蒙恩綸不加斥罷格外優容臣上無以慰宵旰之宸衷下無以對凋殘之百姓徒虧名義何補涓埃此實臣自問自咎非敢飾詞於君父之前者也臣智短才疏於此可見亦由自遭親喪弟又繼亡五內摧傷心氣日耗軍事孔棘不敢言私中夜輾轉恆不能寐追念服官京外將近二十年莫遂一日烏養之私旣不能盡孝於生前復不能盡禮

於身後何以爲子何以自容今者四境已清軍旅已息若猶忘親
戀棧日久因循實負我皇上以孝治天下之意更慙名教臣之獲
戾百解莫辭夙夜難安因憂增病惟有籲懇天恩開臣署缺俾臣
回籍終制稍伸罔極之思臣受特恩不次擢用終制畢即當泥首
闕廷求賞差使不敢稍耽安逸自外生成臣不勝悚惶之至

見同治中

奏議
約編

瀝陳山東吏治情形疏

同治三年五月
山東巡撫任內

閻敬銘

東省羣吏狃於積習陷溺已深以詐僞輕捷爲有才以欺飾彌縫
爲得計以謠誣誹謗爲逞能究其心志無非謀利爭財專圖私便
國計民生罔知念及若錢糧則侵挪捏冒交代則多半不結盜賊
則諱疾忌醫州縣任其狂肆上下習爲寬弛漸至財匱民亂釀爲
今日之憂實皆政事不立上下相蒙所致夫州縣固多不肖何以

獨甚於山東實因東省宦途遇事多支吾敷衍不求實際即有事所難行亦惟以案牘了事若州縣法外生術上司亦知其苦累難堪無可如何儒生正士類少心計舞文弄法或非優爲而由佐雜幕友出身者往往設法互相仿行莫可究詰如東省自道光二十九年清查交代所有無著虧案酌提通省俸廉坐支代人彌縫又以前後軍需報銷多有歸地籌補之款以及各項公用均出通省公攤即以州縣而計大缺每年攤至五六千金中小缺亦有千數百金不等養廉既已提扣無餘年來兵馬紛出差務絡繹又不免格外需求時奉覈減章程每多事後折賠州縣非能取之於家無非上竊公款下勒民財日用私侵糾纏紛雜迨至清算交代逐多方狡飾以爲掩蓋拖延至於濫求妄費陋習相沿視爲成例道府原可督察州縣而養廉一項攤扣減成之外僅有空名無可具領

稍一仰給即已爲所把持關口奪氣貪猾之吏因而挾制成風更無忌憚吏治是以愈壞臣到任一年嚴查捏災督催交代近日州縣似知愧悔臣思馭吏之道非叅劾之難而俾中材可由人人皆奉公守法爲難若欲滌盪心術講明政事非多用正人稍寬文法公私不混出入有經官有以養其廉不可以爲治否則雖峻法嚴刑亦有難施臣實見東省政弊病類痺痿難緩鍼砭每見屬員語言則極口誥誡稟牘則手自批答至於辦理各事深慮欲速不達惟就愚悃所及力圖補救以副宵旰精勤孜孜求治至意

見清史本傳又

按是疏上奉諭曰知之匪艱行之惟艱務須實心實力次第慎免爲之亦見本傳

請道府州縣四項捐例無庸減成疏

同治五年山東巡撫任內

閻敬銘

竊惟捐例之開藉以籌備京外餉糈原爲朝廷萬不得已之政而

行久弊滋不但無補軍糈抑且暗虧國計伏見我皇上御極以來
時以澄叙官方爲念於大學士祁雋藻順天府尹蔣琦齡之奏下
疏通正途之議於給事中郭祥瑞之奏嚴甄別捐納之條於湖南
巡撫惲世臨之奏加實交免保之例仰見聖明洞鑒至悉至詳但
流品之雜名器之濫諸臣皆詳切言之而流弊之極至於侵國帑
病民生者則言之未詳夫國家立賢無方正途出身者未必皆賢
輸納出身者豈盡不肖然捐輸原爲籌餉計臣請即以籌餉言之
外省自道府以至佐雜等官皆准捐納丞佐雜職尙無民社之責
道則巡察數郡府則表率一方州縣一官則寄以地方寄以百姓
寄以城池府庫寄以錢糧徵收責任尤重自古未有不慎選牧令
而能治天下者也即以納資階進亦不宜視之太輕今計各省捐
輸減成章程合以籌餉定例直東兩省離京不遠報捐章程與銅

局相等豫省以餉票折收加一成現銀約居十成之二湖廣川浙約居十成之三江西兩廣約不及十成之三雲貴約居十成之二安徽全收餉票約居十成之一其餘各省均無過於三成者計由俊秀捐納州縣至指省分發不過千金至捐免保舉一成長收現銀亦僅增數百金耳持千餘金之本儼然爲數萬生靈託命之官宜其只計及州縣之有錢糧未必計及地方之有百姓以臣所見收納錢糧而計山東一省大縣五六萬兩小縣亦萬餘兩不等彼以官爲貿易者廁於其間畧一侵吞已逾原捐之數即令嚴查重究參革查鈔而所侵之項已歸無著國家所賴者惟正欸之錢糧捐輸不過補助於萬一若如此明効輸將暗虧帑項通盤籌計是得於捐輸者少而失於帑項者多即爲籌餉計亦不宜減成輕予人以州縣也道府爲督率州縣之官州縣既須照例加成道府亦

應歸一律惟有仰懇皇上飭將道府州縣四項官職仍按籌餉定例減二成章程呈繳實銀均在官銅局不得以鈔票現錢繞算庶救弊補偏而於京餉亦大有裨益或謂現在部定章程凡捐納人員到省後均由督撫甄別立法慎密察吏不明督撫之責也不知巧宦行徑每善彌縫到省之初類能謹慎一經受篆目見可欲遽易其操迨至上官查出糾參於事已爲無及即於此項人員到省嚴爲考試胥予停委停補既非朝廷示人以信之義亦無以激輸公報効之忱且停者此輩安必來者即勝於前待之太輕人不自惜棄置若器政體非宜臣愚以爲徒齊其末不如力遏其源也或謂同一捐資未必捐項多者皆可用之才捐項少者盡不肖之輩不知從前捐納州縣一官不下萬金非家道殷實及自度才器尙堪任使者必不敢冒昧呈捐其父兄亦不令其子弟躁進即任官

後經手錢糧思欲染指自揣身家甚重亦不肯嘗試爲非所以我朝屢開事例權濟一時均無大弊獨至今日不然者實因捐一州縣所費無幾有力者子弟相沿爭爲壟斷無力者借貸而至易於取償官不安於末秩士不安於讀書衆志紛然羣趨於利欲其自愛其可得耶非開捐之爲害而減成之爲害昭昭然矣或謂各省軍務未平需餉正殷京師八旗營餉待用尤急遽議加增恐捐生觀望致餉項無出不知現辦軍務各直省並不專藉捐輸直東豫晉之餉出於地丁江皖湖廣之餉出於地丁者半出於釐稅者半粵閩之餉出於地丁鹽茶陝甘之餉出於地丁協濟川浙之餉出於地丁釐稅惟雲貴兩省餉無所出稍資於此然合歲而計所入無幾究亦無益軍資今僅將此四項官職改歸京局其餘仍許照例減成報捐則各省均可補苴毋庸過慮惟京餉所需甚急何敢

不慎加計議臣在農曹詳知銅局每月所入出於封典職銜貢監生者十之七出於實職官階者十之三此四項在實職官階中尙不能及三分之一即使上兌者少於捐務原無大損况擬收新章照籌餉例定銀數收納實銀以多補少捐一名仍可抵從前之三四名且外省不得報捐則此項必盡歸銅局京局亦一律不准減成則捐生無所希冀人知名器可貴自更樂效輸將京餉將日見其增而無所損此臣所以急請辦理也前准部咨議覆湖南撫臣惲世臨之奏擬俟軍務稍平再行更正部臣綜計盈虛實爲慎重軍餉起見臣之所請非敢不利害兼籌實見此四項官職減成收捐並無益於軍糈而反有傷於國計故敢冒瀆聖慈妄獻末議愚昧之見是否有當伏乞聖鑒訓示

中興奏
議約編

請停東省畝捐疏

同治三年
巡撫任

閻敬銘

竊查僧格林沁於咸豐十年冬間統軍赴東勦辦土捻各匪親歷各地方察看情勢知皖亳捻股闖入山東多由曹單一帶舊隄竄越彼時曹屬按團丁出力已有防隄之舉因隄路縣巨人數衆多自衛桑梓即所以保衛地方不能不籌給口糧以期得力奏請於本省按畝捐資每畝制錢二十文爲防隄經費在案嗣於同治元年四月御史陳廷經奏請各省停止畝捐奉旨允准又經僧格林沁會同前撫臣譚廷襄體察當時情形因防隄防河緊要需用浩繁難即概行停止俯請將曹州府七屬濟寧等四州縣兗州府八屬沂州府七屬分別辦理各等因奏蒙恩允並欽奉上諭務使捐無苛派餉不虛糜以期事歸實濟俟軍務稍平即行奏請停止等因欽此仰見聖慈體察閭閻勤恤民隱之至意臣覆查曹單一帶迭年被擾民間曠廢農業四出遷移是賴辦理隄防一二地方恃

以無恐當時因屢遭蹂躪蠲緩者十常八九正供已屬無多而各
圩派費辦團又皆斂諸田畝是與其捐由民辦不如官辦畝捐尙
可抑豪強而助經費原因軍務未戢一時權宜之計僧格林沁仰
仗天威掃清羣醜皖亳各匪悉數殲除東省地方庶可民守耕鑿
竭力維正之供若仍攤派畝捐不但民力未逮且征多征少難於
稽察徒爲官與民中飽之私彼時僧格林沁因大營需用草料飭
令各屬分投協採有畝捐者准其動用畝捐現查各屬所用畝捐
草料銀錢解交糧臺數目未能盡見踴躍日久弊生實所難免今
據藩司貢璜覓沂曹濟道盧朝安會詳現在股匪削平畝捐一項
無補軍需而難責民間兼完正賦擬請一律停止前來臣當據詳
函商僧格林沁均屬意見相同自應體察目前情形欽遵前奉諭
旨自同治三年正月爲始將覓沂曹濟四府州所屬畝捐概行停

止以廣皇仁其應徵地丁正項應即責成實力催徵民間裁除捐
項專納錢糧自不致再存觀望至僧格林沁移軍駐皖所需軍餉
臣惟有竭力圖籌源源接濟不致貽誤總期事歸實濟上紓聖懷
謹將東省停止畝捐緣由理合恭摺馳奏伏乞聖鑒訓示

見同上均治

中興奏
議續編

奏稽查山西賑務並報起程疏

光緒三年九月
稽察晉賑差次

閻敬銘

竊臣於光緒三年九月十二日承准軍機大臣字寄九月初六日
奉上諭給事中尋鑾燁奏籌備山西荒政閻敬銘寄寓晉省本日
已明降諭旨派令稽察該省賑務當迅速起程周歷災區認真查
核所有應用經費著曾國荃酌量籌給等因欽此又恭奉九月初
六日上諭一道臣當即恭設香案望闕叩頭祇謝天恩訖伏念臣
病免十餘年疊蒙寵召起用宿疾莫瘳未敢苟祿茲復仰叨恩命